



04.10.2022

UKA2022/141/109

Jens Napâtôk', Naleraq

Immikkoortoq 141

Soraarnerussutisiaqarnissamut aaqqissuussinermut pinngitsoorani ilaanissaq pillugu Inatsisartut inatsisaata nr. 21, 28. november 2016-imeersup atorunnaarsinneqarnissaa pillugu siunnersuummik, kingusinnerpaamik UKA2023-mi, saqqummiussinissamut Naalakkersuisut peqquneqarnissaannik Inatsisartut aalajangaaffigisassaattut siunnersuut.

(Inatsisartunut ilaasortaq Pele Broberg, Naleraq)

Immikkoortoq 109

Uunga siunnersuut: Soraarnerussutisiaqalernissamut aaqqissuussinermut peqataasussaaitaaneq pillugu Inatsisartut inatsisaata allanngortinneqarnera pillugu Inatsisartut inatsisaat nr. Xx, xx.xxx 2022-meersoq. (Naliliineq, erseqqissaaneq aningaasartallu killinginik allanngui-neq)

(Aningaasaqarnermut Naligiissitaanermullu Naalakkersuisoq)

Siullermeerneqarnera:

Immikkoortoq 141 Soraarnerussutisiaqarnissamut aaqqissuussinermut pinngitsoorani ilaanissaq pillugu Inatsisartut inatsisaata nr. 21, 28. november 2016-imeersup atorunnaarsinneqarnissaa pillugu siunnersuummik, kingusinnerpaamik UKA2023-mi, saqqummiussinissamut Naalakkersuisut peqquneqarnissaannik Inatsisartut aalajangaaffigisassaattut siunnersuut Inatsisartunut ilaasortap Pele Broberg, Naleraq sinnerlugu saqqummiusnaanut taamatullu:

Immikkoortoq 109 Soraarnerussutisiaqalernissamut aaqqissuussinermut peqataasussaaitaaneq pillugu Inatsisartut inatsisaata allanngortinneqarnera pillugu Inatsisartut inatsisaat nr. Xx, xx.xxx 2022-meersoq. (Naliliineq, erseqqissaaneq aningaasartallu killinginik allanngui-neq) Aningaasaqarnermut Naligiissitaanermullu Naalakkersuisumit saqqummiunneqartumut immikkoortut taakku marluk imm 141 aammalu immikkoortoq 109 pillugit Naleqqamiit imatut oqaaseqaateqassaagut.



Soraarnerussutisiaqarnissamut aaqqissuussinermut pinngitsaalisamik pinngitsoorani katersaqarluni ilaanissaq pillugu inatsisip siunertarineqartumik uniuksimanera ukiuni kingullerni annertuumik sunniuteqapiluutigisai Naleqqamiit aarleqqutigineqartut atuutilernerani ersarissereersimapput.

Inuit akissatigut killeqareersumik inissisimasut inuit inuuniapilooreersut ilanngullugit annertoorejussuarmik innarlerneqarput pinngitsaalisamik katersisussaataitanissamik ilanngunneqarnerat aallartimmat, taamatullu utoqqalinersianut akilersugassanut kinguaattoornikut katersugassanut akilersuinerminni qaavatigut akilersuisussaatanngornerata kingunerisaanik 50 % qulaallugu akiler-aartitaalersut inuppasuit inuuniapilooreersut takusaarpagut.

Taamaammallu aallaqqaammullu sunniutipiluutigisassai Naleqqamiit taakkartortarsimasagut takorluukkatsituut aarleqqutigisatsituut sunniummata assut ilungersunartutut isigalutigut timitarsisagut aallaavigalugit siunertaq pitsaasutut isigineqaraluartoq assut amerlasuunut ilungersunartumik sunniuteqapilummat atorunnaarsinneqartariaqartoq akileraarutit qaavatigut akileraarutit isigigatigu.

Naalakkersuisooqataanitsinni isumaqatigiinniutigineranilu piumasaqaatitta ilagisimavaat atorunnaassasoq. 2022-imut aningaasanut inatsissamut sunniutissai suleqatigisatsinnit qulaajaqqaasasut utikajaarmassuk atorunnaarsinnissaanut ukioq mannamut kinguartinnissaa piffissaq kingulleq atorlugu noqqaassutigineqarmat naaperiarsimavarput atorunnaarsinnissaanut qulaajaanerit ingerlaqqaassasut, tassungalu ilutigalugu akilersuinerit qimataasimanermut innuttaasunut innarleeqisut unitsinnissaat aningaasanut isumaqatigiinniarnermi Naleqqamiit angusaqarfigisimavarput, taamatullu innuttaasut ingasattajaartumik pissakereersut annertuallaarujussuarmik akilersuititaanerisa unitsinneqarneranik tamanna qulakkeerneqarallarluni inissiffiuvoq.

Tamatumunnga ilanngullugu Naleqqamiit katersuisussaataitanermi isertitat 150.000 kr-inik aallartittassasoq qaffanniarsimavarput 175.000 kr-imut inissittariaqartoq qulajaanerup naammassinissaata tungaanut atuuttussamik taannalu maannakkut atuuttoq aallaavigalugu katersuisussaataitaneq ingerlanneqarpoq.

Maannakkut Naalakkersuisut siunnerfiat allanngoqqissimasoq maluginiarparput peqataajunnaarnerput ilutigalugu, tassalu pinngitsaaliilluni utoqqalinersiani katersaqartarnissaq Naalakkersuisoqatigiilersut ingerlatiinnaqqinniaraat maluginiagassaavoq tamannalu Naleqqamiit assorujussuaq tupaallaatigaarput.



Naalakkersuisooqatigiilersut maannakkut pinngitsaalisamik katersuisussaataaneq ingerlatsiinnaqqinniagaat qiviaraanni 175.000 kr.-imik isertitaqarsimasut avannaamiut kujataamiullu inummut ilanngaataat peereerlugu akileraarutaat 44 %-iusup qaavatigut 10 %-imik akiliuteqartalissapput isertitamminniik, naatsumik oqaatigalugu 54%-imik akileraartalissasut oqaatigisariaqarpoq 2026-imi tamakkiisumik akiliuteqartarneq atuutilerpat. Taamaasilluni sulisartoq taamatut isertitaqartup akileraarutinit akiliutigisartagai ukiumut 55.880-iusussat qaavatigut 17.500 ukiumut akilertalerpasuk akileraarut katersugassallu akilertaligassaat 73.380 kr-iussapput 175.000 kr -iminngaaniit peerneqatalertussat aningaasat tigusartagai ukiumut 17.500 kr-imik ikinnerulertussaapput 200.000 isertittarigunikku 20.000 kr.-imik akiliisanerulissapput inuup inuuniarnermini ilungersunareersumi oorisianiit tigullugit katersuititsiniarnerup sunniutipiluutigisassai.

Naak taanna Siumut Nutaamik imminut taagortoq Siumut tungujorpallaalersimalluni aappaloqqittariaqarnermik oqariartuuteqartut, naak taakku partiit pissakinnerusunik illersuiniartartut uani suliniutaasuni annertuumik eqquisussaasoq isiginngitsuusaarlugulusooq sunniutipiloqaqisoq pinngitsaalisamik katersaqarniarnerup ingerlatsiinnaqqinniarnera siunnummassuk.

Uagut pissakinnerusut ilaqtariippassuit isertittakkamikkut annertooujussuarmik taakkununga sunniuteqapiluttussaq eqqarsaatigalugu siunnersuut saqqummiussarput paasineqarluarnissaa kissaatigisimagaluaqaarput, kisiannili ajuusaarnaraluartumik akileraareersut qaavatigut akileraarutitut taaneqarsinnaasumik akilersuisinnaassusaat killeqaqisoq aallerfigineqarnerat assorujussuaq ilungersunartutut Naleqqamiit isigaarput.

Meeraqartiterput taamatut isertitaqartorpassuit, taamaammatt meeraannguinut akissaqarniarnerat innerlerneqartussaavoq annertuumik una siunnersuutaasoq Naalakkersuisooqatigiinnit aaliangiismaannarneqassappat.

Taamatullu aalisartut piniartut il.il isertitaminnik ilanngartuiffigineqalernerat pinngitsaalisamillu utoqqalinersianik katersisussaataanerat ingerlaleranni akilersugaat aamma qaffarsarneqaqqilerput akilersuineruteqqilerpagut uffalu taakku aningaasarsiornitta pingaarnersaattut inissisimallutik nunatsinni suliassaqartitsisut aammalu aningaasarsiornermik pitsaanerpaamik nunatsinni isaatitsiffiullutik inissisimaffiusut.



Inuttaasunut inuuniapilooreersut katersuigunik qanoq tigusaqassanersut ersarinnerusumik saqqummiisoqanngilaq. Ukiut qassit iluaqutigissaneraat qanoq annertutigisumik pissarsissanersut, ilumut nammineq ooriutaat pinngitsaalillugit tigoorarneqartut utoqqarnut qanoq tuttassappat? Tamakkiisumik tigussavaat? Allaffissornermut aammalu toqqortarineranni qanoq iluanaarutigissavaat aningaasat katersat taama naleqartigiinnassappat?

Naalakkersuisooqataanitsinni anguniarlugu sulissutigigaluarparput pinngitsaaliilluni utoqqalinersiaqalernissamik katersisarnerup atorunnaarsinneqarnissaa suliarineqarlunilu nalilersorneqassasoq maannakkullu tupaallannaraluartumik allarlunnarmik isumalerlugu saqqummiunneqaqqippoq tamannalu pissakinnerusunut illersuisuunerugani taakku atugaasa ilungersunareeqisut akiliuteqarnerunissaanik una kaasarfiinik aallerneruvoq.

Naalakkersuisup saqqummiinermini saqqummiuppaa 2040 tungaanut utoqqaat 3000 angullugit amerliallaqqissimassasut maannakkumut kisitsisinut nallersuullugit, oqaatiginngisaalu uaniippoq utoqqaat amerliartornerat 2035 qilaava tikissagaa tassa spiralilersuisimanerit kingunerisaanik 1966 kingorna inunngortartut ikilerujussuarsimaneri ilutigalugu 2035-imi utoqqaat amerliartornerat anikillerujussuartaussamat, taamaammatt utoqqaat nunat allat ilutigalugit amerliartuinnavinnissaanut toqqammavilersortarneq toqqammavilersuiniarnermi uniinerusutut isigaarput.

Naleqqamiit tamakku tamaasa ilanngullugit ataatsimiititaliami nalilersorluarneqarnissaat innersuusutigerusupparput aammalu neriuppugut eqqarsarluartoqaqqissaoq sunniutipiluutigisassai imaannaanngitsuummata ilungersoreersunut aammlu inuuniapilooreersut kaasarfiinik akiliineroqqinnissaanik aqqtissiuineq imaannaanngitsuummat uagullu tamanna Naleqqamiit takusinnaavarput ulluinnarni inuuniapilooreersut inuunerannut innarliivallaartoq, taamaammallu pinngitsaaliilluni utoqqalinersiamik katersaqartarnerup atorunnaarsinneqarnissaa uagut sakkortuumiik pimoorullugu kissaatigaarput tamatuminnga paasineqarusoaqagut innuttaasorpasuit eqqugaasussat amerlasoorpasuit eqqarsaatigalugit.

Taamatut oqaaseqarluta Aningaasaqarnermut akileraartarnermullu ataatsimiititaliamut suliasanngorlugu ingerlateqqipparput.